



Sambanwá

GIYA SA PAGSAMBA KAN BANWAAN NIN DIOS

IKADUWANG DOMINGO KAN CUARESMA
28 FEBRERO 2021 • TAON B • PURPURA

RITO SA PAGPOÓN

Pataratará

C — “Kun an Dios yaon satô, siisay an matumang sa satuya?”

Sa aroaldaw niatong pagkabuhay, nakakaranas kita nin mga manlaen-laen na kasakitan. Ini parte na kan satuyang pagkabuhay blang tawo. Alagad kun an Mahal na Dios yaon sa satuya, an gabos na mga bagay sa satuyang buhay minagian, an mga problema minalipas, asin an kadikloman nasasanglean nin liwanag. Sa pagcelebrar niato kan "Transfiguracion," o an pagbâgo kan anyo ni Jesus, hagadon niato na mabâgo man an pagkahilig ta kan mga bagay-bagay na nagyayari sa satuyang buhay tanganing magtalubo kita sa kabanalan. Lugod an misterio nin liwanag magtao nin dakulang paglaom sa satuya lalong-lalo na sa panahon ngonian.

Antifona sa Paglaog

(Cf. S 24, 6. 2. 22)

(Sinambit kun mayo nin Awit sa Paglaog)

Kagurangnan, giromdoma saimong pagmakulog asin an saimong pagkaherak kaidto pang kapanahonan. An samong mga kaiwal dai nanggad makakadaog samo; Dios ni Israel, ligtasan sa gabos ming kahorasaan.

Pagpangurus asin

Pagtaong-galang *(Tindog)*

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta

nagkasalà ako nin makuri sa isip, sa tataramon, sa gibo, asin sa kapabayaan: salà ko, salà ko, makuring salà ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Dai sinasambit an Kamurawayan.

Colecta

P — Mamibi kita.

O Dios, nagtugon ka samo na hinanyogon an padangat mong Aki, pagkanigoang pabasogon kami sa boot kan saimong tataramon, tanganing, huli sa malinig na espirtual na pakasabot mag-ogma kaming magmansay kan saimong kamurawayan. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon *(Tukaw)*

(Genesis 22, 1-2. 9. 10-13. 15-18)

An Enot na Babasahon nagpapahayag kan dakulang pagtubod asin pagsarig ni Abraham sa Dios. Si Abraham sarong klasikong halimbawa nin pagtubod sa tahaw nin mga kadificilan asin kasakitan kun saen kita minahona na pinapabayaan na kita nin Dios.

Pagbasa sa Libro nin Genesis.

Tinukso nin Dios si Abraham: “Abraham, Abraham,” inapod siya nin Dios. “Uya ako” simbag ni Abraham. An Dios nagsabi: “Daraha an saimong bogtong na aking si Isaac: aking saimong namomotan. Paduman ka sa dagâ nin Moria. Duman idolot mo siya siring sa tinutong na atang sa ibabaw kan bukid na ipapahiling ko saimo.” Pag-abot ninda sa lugar na ipinahiling nin Dios saiya, kinaptan an kutsilyo na igagadan sa saiyang aki asin ibiningat ni Abraham an saiyang kamot. Alagad, hale sa langit. An angel nin Kagurangnan nag-apod: “Abraham, Abraham.” “Uya ako”, simbag ni Abraham. An angel nagsabi: “Hare pagbingatan an saimong kamot laban sa aki. Dai mo siya pagkulgan. Ngonian aram ko na ika may pagkatakot sa Dios. Dai mo isinayuma sako an saimong aki, an saimong bugtong na aki.” Pagtingkalag ni Abraham, nahiling niya an sarong karnero na an mga sungay nakapuropot sa balagon. Kinua ni Abraham an karnero asin inatang na kasalihid kan saiyang aki. Hale sa langit an angel nin Kagurangnan nagsabi giraray ki Abraham: “Ako minasumpa huli ta dai mo isinayuma sako an saimong aki, bebendicionan taka; an saimong mga aki papadakulon ko siring sa mga bitoon sa langit asin siring sa mga baybay sa tampi nin dagat. Masakopan kan saimong mga aki an mga pintoan kan saindang mga kaiwal. An gabos na banwaan sa dagâ magigin paladan huli kan saimong mga aki, bilang balos kan saimong pagtubod.”

Tataramon kan Kagurangnan.

Gabos — **Salamat sa Dios.**

Salmo Responsorio

(Salmo 116, 10. 15. 16-17. 18-19)

S — **Ako malakaw sa atubang nin Kagurangnan sa dagâ nin mga buhay.**

1. Ako nagsarig, dawa ngani ako nagsabi: “Ako nasa makuring

kahorasaan." Mahalaga sa mata nin Kagurangnan an kagadan nin mga maimbod saiya. (S)

2. Surogoon mo ako, Kagurangnan, surogoon mo; hinubad mo an mga nakagapos sako. Atang nin pasasalamat idodolot ko: an ngaran nin Kagurangnan aapodon ko. (S)
3. Mga panuga sa Kagurangnan sakong ootobon sa atubang nin bilog na banwaan, sa mga natad kan harong nin Kagurangnan, sa tahaw mo, O Jerusalem. (S)

Ikaduwang Babasahon

(Roma 8, 31-34)

Kun an Dios yaoii satô, siisay daw an matumang satuya? An kahapotan na ini nagpapahayag sa halipot na paagi kun ano gustong itukdo kan ibang mga babasahon. Kita na mga pinili nin Dios, dapat na makakua nin ranga asin kusog-boót sa mga tataramon na ini kun kita magagi sa kadikloman, pagduwaduwa asin kasakitan.

Pagbasa sa Surat ni San Pablo sa mga taga-Roma.

Kun an Dios parasurog niato siisay an makakalaban satô? Dai pinagkanugonan nin Dios an saiyang sadiring Aki, itinao niya satô gabos; dai daw niya itatao an gabos satô kaiba an siring na balaog? Siisay an masumbong laban sa pinili nin Dios? Kun pinapatawad nin Dios, siisay an mahukom? Si Jesu Cristo? Siya bako lamang nagadan huli sa satô, kundi man nabuhay-liwat sa mga gadan, nasa too nin Dios asin ipinapamibi kita.

Tataramon kan Kagurangnan.
Gabos — Salamat sa Dios.

Pagrokyaw (Tindog)

(Dai sinasambit an Alleluia.)

Hale sa makinang na panganuron nadangog an tingog nin Kagurangnan: uya an sakuyang namomotan na Aki himatea nindo siya.

Evangelio

(Marcos 9, 2-10)

Ipinahayag ni Cristo an saiyang karnurawayan sa atubang kan saiyang mga piniling disipulos. Ini pag-andam sa sainda sa nagdadangadang niyang kagadanan. Siring man, ini nagpapagiromdom na kaipuhan ta man na agihan an kasakitan bâgo makamtan an

kaginhawahan asin katalingkasan sa satong buhay.

P — An Kagurangnan mapa-saindo.

B — **Asin sa saimong espiritu.**

P — ✠ Pagbasa kan Evangelio susog ki San Marcos.

B — **Kamurawayan saimo, Kagurangnan.**

Pakalihis nin anom na aldaw ipinag-iba ni Jesus si Pedro, Santiago asin Juan sa halangkaw na bukid. Sinda sana duman, asin sa atubang ninda si Jesus nagbâgo; an saiyang gubing nagkikintab sa kaputian mas maputi pa sa anuman na nakakaputi.

Dangan nagpahiling sainda si Elias asin si Moises nakipag-olay si Jesus. Si Pedro nagsabi ki Jesus: Maestro, marhay kun digdi na sana kita! Mapagibo kita nin tolong harong-harong: sarô saimo, sarô Moises asin sarô ki Elias. Sa katakotan dai man aram kun ano an saiyang sinasabi. Uminabot an panganuron na nakatahob sainda asin hale sa panganuron may tingog na nagsabi: Ini an sakuyang namomotan na Aki. Himatea nindo siya. Dangan pagkalagkalag ninda, dai na sindang ibang nahiling kundi si Jesus na sana. Paglusot ninda hale sa bukid, pinatanidan sinda ni Jesus: Dai nindo ipag-osip sa kiisay man an saindong nahiling, sagkod na an Aki nin Tawo mabuhay-liwat sa mga gadan. Kinuyog ninda an patanid, minsan ngani saindang pinag-orolayan kun ano an boót sabihon kan pagkabuhay-liwat sa mga gadan.

P — Marahay na Bareta kan Kagurangnan.

B — **Pag-omaw saimo Cristo.**

Homilia (Tukaw)

Pagrokyaw

kan Pagtubod (Tindog)

Credo Apostolico

Gabos — Nagtutubod ako sa Dios Amang makakamhan, Kaglalang kan langit asin dagâ, asin ki Jesu Cristo, Aking bogtong niya, Kagurangnan ta,

(Sa mga minasunod na tataramon, sagkod ki Virgen Maria, an gabos minaduko.)

ipinangidam huli kan Espiritu Santo, namundag ki Virgen Maria, pinasakitan kan panahon ni Poncio Pilato, ipinako sa cruz, nagadan, asin ilinubong, huminilig sa mga gadan, kan ikatolong aldaw

nabuhay-liwat hale sa mga gadan, suminakat sa kalangitan, nagtutukaw sa too kan Dios Amang makakamhan, hale duman mabalik sa paghukom sa mga buhay asin mga gadan. Nagtutubod ako sa Espiritu Santo, sa banal na Simbahan na catolico, sa paropakinaabang nin mga santos, sa pagpatawad nin mga kasâlan, sa pagkabuhay-liwat nin laman, sa buhay na daing kasagkoran. Amen.

Pamibi nin Banwaan

P — Sa bukid nin Tabor, nagsabi an Ama ki Jesus: "Ini an namomotan kong Aki, himatea nindo siya." Bilang mga namomotan niyang aki, masarig niatong idolot saiya an satuyang mga pangangaipo.

S — **Kagurangnan, hinanyoga an samong pamibi.**

1. Tanganing an pamayo kan Simbahan magbanaag kan mamomotan na presencia ni Cristo sa saindang mga paarog, ipamibi niato sa Kagurangnan. (S)
2. Tanganing sa laog kan Cuaresma, ikapahiling niato an kamurawayan kan Dios sa satuyang mga marahay na gibo asin matinaong paglimos, ipamibi niato sa Kagurangnan. (S)
3. Tanganing an mga yaon sa tunay na katibaadan na malagalag sa tamang dalan huli kan saindang mga kakundian, makagami-aw na sinda may hiras sa kamurawayan susog sa panuga kan Dios, ipamibi niato sa Kagurangnan. (S)
4. Tanganing an gabos na naghehelang asin mga biyadi makapasan kan saindang mga cruz na may kusog-boót, ipamibi niato sa Kagurangnan. (S)
5. Tanganing an mga namomotan niatong gadan makahiras sa kamurawayan ni Cristong nabuhay-liwat, ipamibi niato sa Kagurangnan. (S)

P — O Dios samuyang Ama, akua ining mga pamibi na dinodolot mi sa pagtubod. Panoa an samuyang puso kan pagkamoot mo asin padanayon mo kaming maimbod sa Evangelio ni Cristo. Siya na nabubuhay asin naghahade sa kapanahonan sa mga panahon.
B — Amen.

LITURGIA KAN EUCARISTIA

Pagdolot (*Tukaw*)

(*Sinasambit kun mayong Awit sa Pagdolot*)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Dios sagkod pa man.**

P — (*Tindog*) Magpamibi kamo, mga tugang; tanganing an sako asin an saindong atang maako man lugod kan Dios Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — Kagurangnan, namimibi kami, na ining sacrificio maglinig kan samuyang mga kasâlan, asin sa pagcelebrar kan fiesta pascual, magpabanal kan hawak asin kalag kan saimong mga paratubod. Huli ki Cristo samong Kagurangnan.

B — Amen.

Prefacio

Dapit sa Pagbâgong-anyo kan Kagurangnan.

P — An Kagurangnan mapa-saindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo:

Kagurangnan, banal na Ama, Dios na makakamhan na daing kasagkoran huli ki Cristo samong Kagurangnan:

Ta, pinatanidan an mga disipulos kan saiyang kagadanan, siya nagpahiling sainda sa banal na bukid kan saiyang kamurawayan, tanganing, pati sa mga pagsaksi kan tugon asin mga profeta, ipasabot na huli kan Pasion makakamtan an kamurawayan nin pagkabuhay-liwat.

Kaya, kaiba kan mga Virtudes sa kalangitan, padagos kaming nagecelebrar saimo sa dagâ kan saimong kadakulaan, daing ontok na nagrorkyaw:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (*Luhod*)

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (*Tindog*)

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen.

Pagpahayag kan Katoninongan

P — An katoninongan kan Kagurangnan danay na mapa-saindo.

B — **Asin sa saimong espiritu.**

P — Magpatinaraohan kamo nin katoninongan.

Cordero

B — **Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: tawi kami nin katoninongan.**

Pag-alok sa Pagcomunion (*Luhod*)

P — Uya an Cordero kan Dios, uya an nagpaparâ kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Mt 17, 5)

(Sinambit kun mayong Awit sa Comunion)

Ini an Aki kong padangat, sa saiya ako naoogmang marahay; siya hinanyoga nindo.

Pamibi

Pakacomunion (Tindog)

P — Mamibi kita.

Kagurangnan, kaming nag-aako kan mga mamurawayon na misterio, naghingowa sa pagpasalamat saimo, ta, mantang uya pa sa dagâ, kami tinugotan mo dawa ngonian na makisumaro sa mga bagay na langitnon. Huli ki Cristo samong Kagurangnan.

B — Amen.

RITO SA PAGTAPOS

Solemng Bendicion

Pamibi sa Banwaan

P — An Kagurangnan mapa-saindo.

B — Asin sa saimong espiritu.

P — Iduko an saindong mga payo asin maghagad nin bendicion sa mahal na Dios.

Kagurangnan, danay na bendicioni an saimong mga paratubod, asin giboha sindang siring kaimbod sa Marahay na Bareta kan Bogtong mong Aki, kaya lugod makaya nindang padagos na magmawot asin maogmang makaabot sa kamurawayan na an kagayonan niya pinahiling sa mga Apostoles. Huli ki Cristo samong Kagurangnan.

B — Amen.

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.



GIYA SA PAGMISA SA SEMANA

Marzo 1, Lunes

Lunes sa Ikaduwang Semana kan Cuaresma, *Purpura*

Misa — Lunes sa Ikaduwang Semana kan Cuaresma

Mga Babasahon — Dan 9, 4-10 | S 79, 8. 9. 11. 13 | Lc 6, 36-38

Marzo 2, Martes

Martes sa Ikaduwang Semana kan Cuaresma, *Purpura*

Misa — Martes sa Ikaduwang Semana kan Cuaresma

Mga Babasahon — Is 1, 10. 16-20 | S 50, 8-9. 16-17. 21. 23 | Mt 23, 1-12

Marzo 3, Miercoles

Miercoles sa Ikaduwang Semana kan Cuaresma, *Purpura*

Misa — Miercoles sa Ikaduwang Semana kan Cuaresma

Mga Babasahon — Jer 18, 18-20 | S 31, 5-6. 14. 15-16 | Mt 20, 17-28

Marzo 4, Jueves

Jueves sa Ikaduwang Semana kan Cuaresma, *Purpura*

Misa — Jueves sa Ikaduwang Semana kan Cuaresma

Mga Babasahon — Jer 17, 5-10 | S 1, 1-2. 3. 4. 6 | Lc 16, 19-31

Marzo 5, Viernes

Viernes sa Ikaduwang Semana kan Cuaresma, *Purpura*

Misa — Viernes sa Ikaduwang Semana kan Cuaresma

Mga Babasahon — Gen 37, 3-4. 12-13. 17-28 | S 105, 16-17. 18-19. 20-21 | Mt 21, 33-43. 45-46

Marzo 6, Sabado

Sabado sa Ikaduwang Semana kan Cuaresma, *Purpura*

Misa — Sabado sa Ikaduwang Semana kan Cuaresma

Mga Babasahon — Mi 7, 14-15. 18-20 | S 103, 1-2. 3-4. 9-10. 11-12 | Lc 15, 1-3. 11-32



sambanwá
GIYA SA PAGESAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:

Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**

Account Name: **CACERES COMMISSION ON COMMUNICATIONS**

Account Number: **008440050319**